

欽
定
全
唐
文

欽定全唐文卷五百九十八目錄

歐陽詹四

懷州應宏詞試片言折獄論

自明誠論

珍祥論

暗室箴

棧道銘并序

陶器銘并序

補漢書封雍齒冊文

唐天文述

剛卞和述

甘露述

有唐故銀青光祿大夫行平州別駕馬公墓誌銘

有唐故朝議郎行鄂州司倉參軍楊公墓誌銘

大唐故輔國大將軍兼左驍衛將軍御史中丞馬

公墓誌銘

有唐君子鄭公墓誌銘

南陽孝子傳

并論

弔九江驛碑材文

欽定全唐文卷五百九十八

歐陽詹四

懷州應宏詞試片言折獄論

夫子說季路於人曰片言折獄者其由也歟夫子之言蓋有激於季路之云也後之人不窮聖旨以爲夫子美夫季路任一時之見輕而折獄者十有八九焉迂哉斯人也夫兩訟之爲獄獄折而有刑刑者例也例者成也一成而不可變不其重歟古之帝王將刑一人循三槐歷九棘訊羣臣訊羣吏訊萬人億兆絕議然後致法徇於朝於市於野

昭然與衆方棄之所以不易也君莫聖於堯而有舜禹稷
契佐之莫明於舜而有夔龍縉雲高陽佐之莫哲於禹莫
賢於湯莫察於文武莫敏於成康於時皆濟濟盈朝明明
在位豈無獨見而可臆斷慎刑之道如斯不敢失明刑獄
不可輕也凡至獄訟多在小人至於訟也皆欲已勝何則
不勝乃罪戾隨之若是則君子時或妄訟於人未有小人
而能自訟者片之爲言偏也偏言一家之詞也偏詞雖若
子不信之矧非君子乎且先師曰人而無恆不可以作巫
醫巫以鬼神占醫以筋脈體無恆之人筋脈且不足以自

體而况訟乎鬼神不足以爲占而况視聽乎以斯折獄也
小則肌膚必有扶撲之濫焉大則性命必有鈇鑕之冤焉
夫子祖述堯舜憲章文武師老聃而崇周公此六人無一
以傷於人者夫子豈好輕傷哉脫夫子實爲片言可以折
獄也不幾乎一言可以喪邦歟夫子之言非於季路賢者
審之片言不可以折獄必然之理也

自明誠論

自性達物曰誠自學達誠曰明上聖述誠以啟明其次考
明以得誠苟非將聖未有不由明而致誠者文武周公自

性而誠者也無其性不可得而及矣顏子游夏得誠自明者也有其明可得而至焉從古而還自明而誠者衆矣尹喜自明誠而長生公孫宏自明誠而爲卿張子房自明誠而輔劉公孫鞅自明誠而佐嬴明之於誠猶玉待琢器用於是乎成故曰玉不琢不成器人不學不知道器者隱於不琢而見於琢者也誠者隱於不明而見乎明者也無有琢玉而不成器用明而不至誠焉嗚呼旣明且誠施之身可以正百行而通神明處之家可以事父母而親弟兄遊於鄉可以睦閭里而寧訟爭行於國可以輯羣臣而子黎

耻立於朝可以上下序據於天下可以教化平明之於誠
所恨不誠也苟誠也蹈水火其罔害彌天地而必答豈止
君臣鄉黨之間乎父子兄弟之際乎大哉明誠也凡百君
子有明也何不急夫誠先師有言曰生而知之者上也所
謂自性而誠者也又曰學而知之者次也所謂自明而誠
者也且仁遠乎哉我欲仁斯仁至矣夫然則自明而誠可
致也苟致之者與自性而誠異派而同流矣知之者知之
委之者知之

珍祥論

漢武帝覽交門之歌顧謂東方大夫曰古人列后巍巍蕩蕩者則予今日其庶幾乎東方大夫曰何謂也曰遠人率俾天降珍祥殷湯上感實獲白狼周成旁浹遠致越裳放勳曰聖幸祀四方武乙不淑出有震亡予享虞舜於九疑弔罷民乎盛唐登名山於華陰俯大川乎潯陽天清地謐符應昭彰是曠跡交神致放勳之慶修身遠害免武乙之殃紫芝產於甘泉白麟呈於雍時天馬生於渥洼之域寶鼎出於汾水之濱風雲草木相繼於時頭飛鼻飲之長涅齒穿胃之貌絕域款塞無月無之是多白狼之祉不少越

裳之珍也比夫巍巍蕩蕩爾有何見而感焉東方大夫曰
噫陛下誤意巍巍蕩蕩歟非古所謂巍巍蕩蕩者夫巍巍
者德之容蕩蕩者化之稱非謂廣遊從於險阻幸髣髴於
神祇錄莫測於妖祥免偶然之壓溺致儻來之貢賦獲無
用之戎狄耳且此之數者理不可馮亦明也秦皇帝周施
天下不爲德我太宗不下階闥不爲微周懿死於牖下不
爲是虞舜崩於蒼梧不爲非虢叔得神喪其國西伯無神
人以歸龍降於庭夏道昧雉離於鼎商祚輝苗民逆命堯
以盛有緡來賓桀以衰以此觀之卽虐如秦皇雖車轍遍

於宇內不如太宗端拱於堂上也弱如周懿雖終於帷席
不如虞舜之沒於草莽也淫如虢叔雖獲靈祐不如西伯
無所禱祈也邪如孔甲雖有嘉祥不如武丁之妖怪也酷
如夏桀雖異人屈膝不如唐堯域中之解體也天道冲融
變化無窮發祥布象時異始而同終神理閔密吉凶罔測
示形告兆亦同紀而異極有多端以表善有積慶以稔慝
有無災以厚毒有見眚以警德今多端多慶不知天之表
善歟其稔慝歟無災無眚不知神之厚毒歟其亦警德歟
以是先王或不致珍祥而有天下或屢服蠻夷而覆宗社

或有鴻災巨眚國以寧或有靈蹤異跡而身以傾珍祥之
實乍凶乍吉妖怪之蹤乍吉乍凶譬諸藥工也其有活人
之者亦有殺人之者焉譬諸酒醴也雖有敗人之道固有
成人之道焉武帝曰若之何而信之曰唯德可以信之欽
若上帝輯寧下民其表善也雖休勿休則百福是適其稔
慝也將覆不覆則轉禍爲福且人神之主天地之心也孰
爲妖怪神祇也孰爲珍祥天地也者苟修德以待人未有
主人怡悅而客忿怒心善而形爲惡也若有其德日覩妖
怪其巍巍也若無其德日對珍祥其未蕩蕩也武帝矍然

斂膝而言曰善矣哉微而體大珍祥不必利妖怪不必害而今而後以二者棄乎道德之外敕內府詔宗伯加東方大夫命一等而贈之東帛

暗室箴

夫行以檢身非以爲人無淫無佚其處宜一孜孜碩人冥冥暗室罔縱爾神罔輕爾質遠茲小惡念彼元吉勿謂旁帷上蓋天監無外勿謂後掩前扁神在無形天不長慝神實正直神怒天誅未始有極昔者趙盾假寐兢莊天迴厥害鉏麇以亡又有符堅竊爲制度神敗其類蒼蠅以呼天

窺神窺人無不知神忿天忿身無所隱澗松抱節幽蘭有
薰歲寒不變無人亦芬草木猶爾人其曷云恐懼乎其所
不見戒慎乎其所不聞先師有言敢告夫君

棧道銘

并序

秦之坤蜀之艮連高夾深九州之險也陰谿窮谷萬仞直
下奔崖峭壁千里無土亘隔呀絕巉巉冥冥麋鹿無蹊猿
猱相望自三代而往蹄足莫之能越秦雖有心蜀雖有情
五萬年間莫不相接且秦之與蜀也人一其性物同所宜
嗜慾無餘門教化無餘源可貿遷可親昵擘坼地脈睽離

物理豈造化之意乎天實凝清而成地實凝濁而形當其凝也如鎔金下鑄騰雲上浮空隙有所不開迴翔有所不合澄結既定窾缺生乎其中西南有漏天天之窾缺也於斯有茲地地之窾缺也天地也者將以上覆下燾含蓄萬靈可通必使而通者也苟有可通而未通則聖賢代其工而通之故有爲舟以濟川爲梯以踰山唯茲地有川不可以舟涉有山不可以梯及粵有智慮以全元造立巨衡而舉追氏鯁懸鑪以下梓人猿垂絕冥鳥傍危岑鑿積石以全力梁半空於木柵斜根玉壘旁綴青泥截斷岸以虹矯

繞翠屏而龍蹠堅勁膠固雲橫砥平總庸蜀之通途統岐
雍之康莊都邑之能步山川之無脛若水決防如鴻向陽
南之北之踵武湯湯躋峨峨以自若臨蒼蒼而不懼繇是
贊幣以達人神會同稽禮樂之短長量威力之汗隆可王
者王可公者公而相次以風或曰受琢之石長存可構之
材無窮易剏代蠹斯道也未始有終嗚呼爲上懷來在乎
德爲下昭德在乎義德義之如今日則或人之言有乎其
反之則石雖存恐不爲琢材雖多恐不爲構想夫往昔有
時而有有時而無是用惕惕天下蚩蚩知聖賢創物之意

之人寡明德義固物之道之人稀敢陳兩端之要銘諸斯
道之左庶主德義者存今日之所履踵武湯者荷古人之
攸作銘曰

天覆地燾本亦備設大象難全或漏或缺損多益寡聖賢
代工彼雖有缺與無缺同維北則秦維南則蜀地缺其間
坤維不續斗起斷岸屹爲兩區秦人路絕蜀火烟孤天實
不通賢斯有造鑽堅剡勁無蹊以道若川匪舟若陸匪車
緣危轉虛步驟交如構雖在功存亦由德項怫劉怒從完
以陪隋落我營自顛而植地非革勢材不易林陪植之致

惠恕之心勿謂斯道不恆勿謂斯道可久禮不以禮可有而無恭不以恭可無而有創之之意如彼固之之理若茲彼知不易茲而易知勒石道左其同我思

陶器銘

并序

嘗侍論於長者僂有之曰近代之作玉杯麗則麗矣愚以謂不如古人之爲陶長者韙之以爲知言退而思其所自多亦不忝伊人之譽器以利用道從易簡利用者貴無往而不適易簡者取立功而匪勤今天下之至富者土也不勞而成者火也夫陶掬壤以製焚蒸以凝就其不勞因其

至富不瑩而冰清珠琬不鍛而金固石堅一工致功千室
以給劑鬲罍甗餅缶盃盂大窮儉石小極圭撮經鼎鑊而
自若在煇赫而莫渝滿堂絕侈靡之譏提挈無剽殺之患
其功則易簡也其實則利用也其藏又保安也易簡二儀
之理利用五行之本保安立身之方執人之方履物之本
從天地之理此三皇五帝所以內戶不扃外戶不閉無爲
之德所由生也豈夫玉杯之獨劣其餘孰得而儔焉則刊
材搜璞窮山越壑礪磨雕琢鑄鍊丹腹力盡終年之功財
殫不訾之產量纔升合質忌湯火寘家得奢盈之議中懷

生賊害之累其功則非易簡也其實則非利用也其藏又非保安也悖二儀之理違五行之本乖立身之方此夏桀商紂所以人人頗邪比屋可戮亡身之禍所由生也省費鮮勞皆備於物德且如彼而人賤之煩人蠹財不周於用禍又如此而人貴之久矣哉世之迷也物有賤而可貴亦有貴而可賤惟賢者能審之小子不幸億而有中誠背常人之見敬爲銘以廣之銘曰

黜汙易杯聖人製器易簡作程利用爲貴稽諸往載陶實攸興裁因掬壤成假焚蒸不腹不丹不雕不刻自結金堅

天然冰色財無害產功匪殫力量盡洪纖用窮幽仄物有
千金相異我取不費爲利物有積功相崇我取不勞爲工
物有患湯忌火我取往無不可物有剽殺焚軀我取懷藏
不虞心存目視奢尋彼至室滿堂盈侈莫我生省庸周用
所賤謂何賈害勤人所貴者那可貴不貴物失其類失類
曰昏雖隆必墜可賤不賤物得其選得選曰明雖幽必見
上惟五帝下洎三王實有以興亦有以亡蚩蚩百工孰若
我陶敬銘有器永告滔滔

補漢書封雍齒冊文

曰臣節貴忠后德貴公忠則爲其主所自盡公則於其人罔以私咨爾雍齒爾有臣節孔明予以公心獎爾其敬聽予言罔忒嗚呼昔嬴氏不臧流毒四海天將剿絕厥類假手於予一人爾主項氏昧厥命木蠹豬突附振旁撓予在泉未躍用困於彭地爾爲厥主來戕予實有必戮之志罔若天之厯數徂於予躬俾泰山萬尋蔽於一葉予於所自隱有見爾心於時爾爲楚臣予爲漢人予則爾仇敵爾宜討之予罔攸憾今大寶歸予夷嬴殲項予欽若上帝惟天下君爾則率土之濱罔非予民予宜子之爾罔攸惕夫爵

以尊德祿以養賢爾能致身於厥主孰若爾賢德予分爾
茅土以勸所事君爾奉上之誠罔易乎舊予體元之政咸
用維新砥礪爾能輔予一人兢兢慄慄共聞大猷無使齊
桓管仲專於棄瑕之美念之哉

唐天文述

天雖覆育生生如其情則或與或否其與也非徒與其否
也非徒否受命有生生者率其道反其道之致焉率則與
反則否斯理也固必信至皇帝以享皇唐百七十有一載
皇帝御宇之十四祀也歲在辛未實貞元七年其受命率

道天與生生如情之秋與神哉靈哉明允惠和哉是歲之
天也亭乎其正洞九霄之清澈清澈之中若有伺夫有求
者鬱乎其變浮五色以薰郁薰郁之中若有察夫所厭者
稱物之性應時之欲手足之赴人心羽翼之循鳥情農夫
在畦蠶婦在林商或舟車工或埏埴願燥願濕罔不從志
其餘則三光序流六氣時行上至事事下泊營營羽毛鱗
介勾甲芽萌求諸濡渥則常雨求諸煦旭則常晴求諸吹
蕩則常風求諸恬謐則常寧求諸烟雲則常陰求諸日月
則常明非不雨也非不晴也非不風也非不寧也非不陰

也非不明也合雨而後雨物不乏其雨合晴而後晴物不
乏其晴合風而後風物不乏其風合寧而後寧物不乏其
寧合陰而後陰物不乏其陰合明而後明物不乏其明實
皇帝知上帝以生生爲己物與其禍福配已得失而寘之
欽若兢若溫如穆如心性二儀支體四時似續上元之效
與夫人子能領父之憂承父之命繼堂紹構得其心贈遺
獻酬愜其衷則財賄器物唯意是役牧圉臺隸惟意是用
以其役無不當也以其用無不宜也土德勝隋天實維唐
皇帝則唐天第九子也旣克負荷上天所以唯意焉且烟

雲風雨亦天之財賄也日月星辰亦天之器物也神祇精靈亦天之牧圉臺隸也是以皇帝動息神祇莫不隨旨趣精靈莫不申肅穆寂寥駱驛虛無囊篋日月管鑰風雨敬恭誅責而啟閉多少之故將蔭休施烟雲若自諸帷幕而使舒張矣將洒潤散風雨若自諸盆罍而使澆扇矣將烜清晝布陽德若自諸鑪竈而使燂灼矣將光幽夜啟陰靈若自諸燈燭而使昭明矣處置唯滋含靈不折莓莓熙熙蓋子祇父慈相爲福釐也凡書惡記善雖史官之職箴人述德或人所通規鯁生則人之一夫耳謳吟日用而爲之

志若簡冊已載復何言哉儻猶未也庶補其闕是歲也扶
風竇公參河中董公晉輔政之三年趙郡李公紆爲天官
之四年范陽盧公徵爲地官之元年范陽張公濛爲春官
之三年昌黎韓公洄爲夏官之三年吳郡陸公贄同爲夏
官之二年京兆杜公黃裳爲秋官之二年清河張公彧爲
冬官之五年夫太宰六官於天子之爲理勢澄派而清洪
流者故列於斯志之末

則卞和述

昔卞和以荆山之璞獻楚懷王王曰非寶也則之次獻於

平王平王亦曰非寶也又則之世皆有二君不識寶之議
小子鄙慮嘗致於斯瞍瞍然若見二君之意後世議者脫
未之思焉夫國之安危人之邪正如影與響繫乎后躬于
則從而于易則從而易珠玉者勞之母財之蠹侈之本害
之圃國君好之下必從之則將有不耕而搜山不藝而攻
石背義而忘仁輕穀而賤帛耕之隳藝之墮穀之散帛之
耗義之虧仁之挫則國從而喪矣古人有言曰不貴難得
之貨使民不爲盜又曰大寶曰位二君所言卞氏之璞非
寶者蓋寶此者也不然玉之與石猶菽比麥雖至愚昧亦

或辨之况二君乎縱時狐疑忍愛玉人須臾之功不試琢磨於一石而忽先王之法輕絕人之四體歟甚不然矣實將抑奇玩却無益翦奢靡之萌啟淳龐之跡欲其塊桴土鼓上復於羲軒象箸玉杯下銷於辛受四方風行而自化百姓日用而不知也大功無形至德無名人以瑣瑣之智莫覩冥冥之情昔宋玉以蕃禽并鮒不測靈鳳長鯨信哉嗚呼使仲尼居今則與秦伯同稱矣小子不敏竊述其旨以佐知言云

甘露述

述甘露昭孝德也貞元壬申歲福州福唐縣尉清源莆田
邑人濟南林公瓚太夫人終公每一痛至水漿不入口或
三日或五日內外羸憊殆至殞滅癸酉將與先府君修合
葬之禮公之於親事存旣竭其力送終思盡其勤曰含襚
品章則有王度不敢或越也塋域固護實在我私當懇行
之而已於是躬開坎室自埏塿甕與兄弟手攻肩負以鑿
以築雖率情性而無僣法度不違典禮而有異常儀載考
載理而未之窺春三月五日忽異氣自天氛氲下蒙非雲
非烟冪冪絲絲彩耀光鮮馨香馥然起朝及暝徘徊不散

先是繞壘已栽松柏泊晨枝葉間遍懸露滴其滴齊大如
梧子公奇之與兄弟及鄉人時相慰者而嘗之其味甘異
於人間所甘之味日漸高不銷不晞轉堅轉明瑩然珠相
鏗然玉聲如是者三日覩者爭取或食或翫噫天冥冥其
閒蓄靈地陳陳其閒蓄神靈無形神無身無形無言無身
無聲苟有可褒以物而旌苟無可褒物不虛行其德常其
物常其德稀其物稀予聞甘露之說莫覲甘露之實其爲
稀也不亦甚乎今爲公而降公之德豈常德歟况殊香啟
途異彩相宣凝結豐圓向日翻堅者哉則其至誠所招又

多矣予執弔禮幸獲而見珍聳不足遂爲之述

有唐故銀青光祿大夫行平州別駕馬公墓誌銘

嗚呼死也者君子曰終有唐興元二年六月二十四日銀青光祿大夫行平州別駕馬公終於京師國喪英才家亡令子家國不幸痛毒可知公諱某字某其先京兆扶風人始實趙氏累葉繼將多總戎塞下有以因居今爲燕之名流曾祖某某官祖某某官父某某官公則某官第某子也積奕世忠貞之慶得陰方嚴勁之氣天骨山峻神葱玉輝有孝有悌閨門以和有信有義州閭以附矛戟韞器風雲

馳聲燕趙多奇士公其人也用正直奉籌略擁旄仗節者
尊以果斷行政令擐甲執兵者伏前後佐全師大幕不有
暫寧方將張翼翔雲揚鬚遊溟大命不永大病遘及享年
三十三秦氏醫遲顏生禍促哀哉夫人某處某氏子二人
長曰縱次日緒永思之感至性過人以貞元十二年歲在
某月某日大通卜宅於京兆某鄉某里某原禮也天長地
久堙川塹阜於何不有乃爲銘德而誌墓云

士比常才如瑜在珉燕趙多奇公則其人業繼忠貞識資
籌略器流瑚璉羽族雕鶚題輿大郡佐律雄師雖猶在德

亦匪孤時南仰搏鵬更期遐颺東觀逝水忽茲永往卜遠
斯及窆於此岡惟安惟永地久天長

有唐故朝議郎行鄂州司倉參軍楊公墓誌銘

公諱某字某其先關右宏農人永嘉過江公自始遷之祖
若干代處於閩越曾祖某皇唐循州司馬祖某漳州長史
父某泉州南安縣丞公則南安第若干子長七尺骨目瓌
異溫良節行所至自昭風神識度羣居不掩六籍外偏好
穰苴管子之術永泰中以耕戰之法致梁宋軍畫用有成
大厯元年節度使右僕射田公薦授左武衛率府倉曹參

軍事在位以貞慎聞公以不仕則墜業躁求則背道或出
或處聖人爲中依吏部節文敬遵常調大厯八年集授吉
州永新縣丞興元元年集授廬州司田參軍貞元二年授
鄂州司倉參軍累職貞慎如率府倉曹時每罷官待集卜
勝屏居晏如也鄂州秩滿愛其風土亦止焉貞元十二年
冬又合集春赴京師遇疾於途以二月四日終於汝州龍
興縣之逆旅時年六十七凡入仕三十一年厯官四政祿
非豐儉以足務雖劇通以簡上以中正重下以公平矚皆
白珪無玷朱絃有聲嗚呼公之材之量如鐘含音如水待

盛大小當應方圓必合我則不銜人胡不求莫能全展光
耀以至殞沒悲夫夫保性居業時行則行時止則止道也
公昔於名宦之理是焉士祿農耕猶生則營若死則已亦
道也公昨於歧路之役是焉公存以道始亡以道終至人
不違道公與之周旋正矣乎善始終者也夫人隴西彭氏
戴天之感痛以禮成長子晃次子暈季子杲伏凶之號以
至見血以某年某月日卜葬某鄉某原禮也佳城一閉他
時古邱後之人孰知邱中之德墓許有誌故爲墓誌銘庶
覩今爲古者明斯地泉下有君子焉銘曰

一種鱗物神則曰龍一種植物貞則曰松楊公於人被貞役神藝術潛宏溫良內克名不稱實祿有負德天桃信美不能秋數冬日可愛亦用西徂大期斯來無賢無愚英英楊公與逝川俱卜此修原有形永宅東海西山其廬罔易大唐故輔國大將軍兼左驍衛將軍御史中丞馬

公墓誌銘

墓有誌誌有銘誌記也銘名也名之記墓庶高岸爲谷幽壤或呈情當掩者有所歸認斯馬公之墓也公諱實字某其先扶風人生於幽州高祖某某官祖某某官父某某官

若干子皆以雄謀果斷稱公則第三人長八尺有羨鵬姿
鶚靈霜嚴壁峻樂而後笑時而後言孝弟忠信分義節概
覩容可見好史學厯代英豪得失皆覈其有不正不直辯
論慷慨若加諸已明陰符善司馬法起家爲范陽軍要籍
本軍疑政畫多自出遷千夫長萬夫長三軍兵馬使莫州
近邊戎數爲害本軍元帥請統鎮之戎遠逃遁莫人大入
拜御史中丞莫州刺史俄薊州之患如莫州移薊州薊人
繼康攝州刺史貞元初本軍之事有大者合議於天子自
管內二千石已下擇賢能以公當其選天子異其議奇其

詞決所議答於本軍而留近侍拜左驍衛將軍宿衛十一年長松在林利錐處囊森竦穎脫鋒幹獨見天子儲而將用未有所當貞元十四年寢疾其年七月十一日終於京師常樂里之私第出身從事若干年署職莅官若干政春秋五十一當時俊傑懷材抱器者無不驚呼嘆息嗚呼騏驥有騰千騁萬之足伏乎櫪干將有剗犀截象之鉏閉乎匣將用未用一朝變化爲骨燕市入泉延平爲知人之痛惜公其比歟夫人雁門田氏雁門郡王某之女哭泣之慕痛而中禮男五人一人先公卒四人在曰綬曰纘曰某曰

某綬年三十八殯年十五其餘幼稚不言可知女二人一人先公卒一人在四歲至性攀號感動飛走以某年十一月一日卜葬於京兆府萬年縣洪固鄉延信里司馬村之少陵原禮也其承眷長沙歐陽某執紼及墓就誌而銘曰骨肉歸土賢愚共門英英馬公亦封此原大節大成平生所志貞心壯氣松孤壁峙掄擇雖致材成則未岑峯蒼翠俄摧忽墜修短無涯傷如之何

有唐君子鄭公墓誌銘

貞元十一年歲次乙亥某月某日清源郡晉江縣君子鄭

公年若干終於其居州閭親識遠近漣涕重吉人也嗚呼
杞梓植於深林人雖不知不妨其爲天下之材也珠玉碎
於重泉人雖未玩不妨其喪天下之寶也公之生則深林
之材公之歿則重泉之寶不知而有未玩而亡哀哉公諱
晚字季實其先宅滎陽永嘉之遷遠祖自江上更徙於閩
今爲清源晉江人曾祖某官祖某官父某官太夫人同郡
潁川陳氏育者三男三女公則長男也自七八歲則明敏
嚴潔無復童心泊十二三則溫良貞亮有成人之德旣冠
儀表可觀孝悌惠和侔於前哲人望無聞時譽皆歸鳳不

近腥龍多自盤優游仁里四十不試詹有若人之妹獲配
於公公太夫人早世妹不逮事則見公霜露之感蒸嘗之
敬公尊府君近捐甘旨妹及同養則見公晨昏之愛縗斬
之至奉公居閨門鄉黨者十有五年顧詹於公善良內外
兼得受命不永其如命何蘭芬蕙馨或亦中敗惜哉子二
人皆幼公在日名之曰彥方彥章詹旣在京師不遂撫慰
來人有述實孺能號妻亦聞哀有過人禮不踰制寔取遠
日堂殯三年以貞元十二年某月日永厝於郡城東偏聞
儒里常熟湖之北原禮也妹有遠告咨予題誌旣忝真懿

實舊知人江嶺則遐想像不昧取思芳茂爲銘以寄銘曰
有斐季實君子之禎忠信溫良自幼而行少不改任長更
推誠材植遠林寶產遐壤無知無玩自生自喪骨肉歸土
用瘞斯原嗚呼斯原永棲君子之魂

南陽孝子傳

并論

貞元九年某旅行號州稅於村店有一黨先止焉老翁一
人丈夫一人婦人一人孩幼兩三人丈夫出絹兩疋賣其
囊裏衣服非稱有其絹者視絹有字乃故人鄭師儉手題
其名焉問所得曰來自襄陽至臨漢之北郊有閔吾父年

老而所乘驢弱者遺此絹使與驢博驢問得姓名乎曰其人扶護親喪迴上京不知姓名也某旣占鄭書又知鄭侍君靈櫬自南當由彼而還也意其必鄭焉不復問焉各遵所往貞元十一年獲與鄭遇因道所見鄭歔歔爲言之曰豫章之迴次南陽大澤見一貧翁乘驢驢甚瘠一丈夫肩負雜物可三十觔妻抱半歲嬰孩童稚驅行兩人山路初盡始行陂澤屬久霖雨泥水深老翁瘠驢往往顛踣丈夫則翁之子也每見驢倒擲其負若泥若水無顧惜扶抱洗拭淚輒盈目倒旣數悲不自勝遂以所負置諸驢而負其

父平田積雨潦淖到脛不至店舍竟無憩歇父在子上殊自安暢子在父下亦盡歡心父與子笑子與父笑如同乘高車連轡逸騎怡怡焉欣欣焉與之行止者三日日無易日時愛其事父母能竭其力也又痛自欲竭力已無其所贈絹一疋令與驢博驢代以載父其人將求驢者三店知欲分路却其絹曰無驢可博願復本絹始嘉其孝又貴以忠爲度一絹博驢未就更與一絹自此東西足下之見豈斯人歟某以如其所行是難能也是亦皇唐純孝一人焉行既可述遂以鄭說爲之傳其間問其姓氏亦不知何

許人實於南陽澤中見之還以爲南陽孝子論曰

負父信孝矣而贈絹非孝歟唯其有之是以似之鄭與南陽孝子偕孝矣

弔九江驛碑材文

弔傷而有辭者也噫九江驛之碑其何興辭而弔歟斯碑之材昔太師魯國顏忠肅公所建祖亭之碑也公素負辭華昭代之銘誌多公之辭又好采異留名之致頃爲湖州牧州產碑材石每使工琢之與詞兼行磨礱而成常心使用者不可勝數斯碑也終山之窮僻得之於自然趺本有

龜護頂有螭雖不甚成而拏攫儼興如神如靈公神而珍之精選所處湖州無稱立罷守迴朝載而途卜出蘇臺入毗陵亦無稱立轉丹陽遊建業亦無稱立次江州州南有湖湖東有山蛟奔螭引直至湖心頓趾之處則茂林峭石勢瓌氣勝非往時所睇而神祠曰祖將軍廟在焉公覲其詭秀與碑材叶卽日以酒醑奠其祖神出錢五萬造亭曰祖亭南香爐峰北潯陽城九江爲庭千艘厯堦亭旣就公製亭之文手勒斯碑而立之公文爲天下最書爲天下最斯亭之地亦天下最庶資三善加以斯碑之奇相持萬古

而采異留名之致一得也後典州吏於州之九江驛有修
坏之勞狀其末績乃取斯碑刻公之述寘已之述今爲九
江驛之碑焉予旅遊江州稅於茲驛祠部員外郎鄭恕同
之鄭與州將嚴士良共爲予說而俱以相示嗚呼先賤後
貴世之常也先貴後賤人之傷也以祖亭方九江驛則蘭
室鮑肆矣以魯公之文方今之文則牢醴糟糠矣以魯公
之札翰方今之札翰則錦繡泉麻矣以魯公之用方今之
用則華夏夷狄矣痛哉斯碑出祖亭入九江驛失魯公文
得人之文削魯公之札翰題人之札翰亡魯公之用就人

之用是去蘭室而居鮑肆捨牢醴而食糟糠脫錦繡而服
臬麻黜諸夏而卽夷狄可悲之甚者況我質天成必將可
名魯公所以卜擇敬慎如彼而常人無良黷辱如此與有
道而黥無罪而刑投四裔禦魑魅何以別邪石不能言豈
其無冤故弔之有文曰

情違乃傷理拂乃冤人實有之物亦應然嗚呼子碑冤可
予知陰隲子材豈曰無意必有以殊方頒以異與顏表勝
以殊則名從吏居卑以異奚旌子產旣授子不終致悠悠
彼蒼何嗟及矣美玉抵禽高冠藉足有類子碑先榮後辱

繼世生哲詎無賢兮將覲於斯將倬於斯庶滌所黷而復
攸宜屹屹子碑如神如祇人得以專天造何爲其不然矣
其不然矣

欽定全唐文

卷五百九十八

三

欽定全唐文卷五百九十九目錄

劉禹錫一

望賦

何卜賦

傷往賦有序

平權衡賦

砥石賦有序

山陽城賦有序

楚望賦有序

秋聲賦有序

三良冢賦有序

謫九年賦

問大鈞賦有序

授倉部郎中制

授主客郎中制

授比部郎中制

授屯田郎中制

擬太子太傅制

擬太子太保制

欽定全唐文

卷五百九十九

目錄

二

[illegible]

欽定全唐文卷五百九十九

劉禹錫一

禹錫字夢得彭城人貞元九年進士又登博學宏詞科順
宗朝擢屯田員外郎憲宗立貶連州刺史開成中官至太
子賓客分司會昌二年卒年七十一贈戶部尚書

望賦

邈不語兮臨風境自外兮感從中晦明轉續兮八極鴻蒙
上下交氣兮羣生異容發孤照於寸眸驚遐情乎太空物
乘化兮多象人遇時兮不同嗟乎有目者必騁望以盡意

當望者必緣情而感時有待者瞿瞿忘懷者熙熙慮深者
瞠然若喪樂極者冲然無違外徙倚其如一中紕紛兮若
斯望如何其望最樂晞慶霄兮遡阿閣如雲兮天顏咫尺
如草兮臣心踴躍扇交翟兮歲蕤旗升龍兮蠖略日轉黃
道天開碧落凝瑞景於庭樹掬非烟於殿幕望如何其望
且懽登灞岸兮見長安紛擾擾兮紅塵合鬱葱葱兮佳氣
盤池象漢兮昭回城依斗兮闌干避御史之驄馬逐倖臣
之金丸望如何其望攸好宗萬靈兮越四隩漢帝仙臺兮
秦皇海嶠霓裳踊於河上馬跡窮乎越徼紫氣度關而斐

聖神光屬天而照耀皖眷眷以馳情聳專專而觀妙望如
何其望有形視蠹蠹兮窮冥冥楚塞氛惡兮蕭關燧明暈
籠孤月兮角奮長庚沙多似雪磧有疑城烟雲非女子之
氣草木盡王者之兵審曳柴之虛警破來騎之先聲信有
得於風鳥示無言於旆旌望如何其望且慕恩意隔今年
光度雕輦已辭兮金屋何處長信草生兮長門日暮篈翠
華之儻來仰元天以自訴况復湘水無還漳河空注淚染
枝葉香餘紈素風蕭蕭兮北渚波烟漠漠兮西陵樹夫不
歸兮江上石子可見兮秦原墓柏琴翻朔塞之音挾瑟指

邯鄲之路望如何其望最傷侯環玦兮思帝鄉龍門不見
兮雲霧蒼蒼喬木何許兮山高水長春之氣兮悅萬族獨
含嘖兮千里目秋之景兮懸清光偏結憤兮九迴腸羨環
拱於白榆惜馳暉於落棠諒衝斗兮誰見伊戴盆兮何望
豈止蘇武在胡管寧浮海送飛鴻之滅沒附陰火之光彩
鶴頸長引烏頭未改恨已極兮平原空起何時兮東山在
永望如何傷懷孔多降將有依風之感宮人成憶月之歌
歌曰張衡側身愁思久王粲登樓日迴首不作渭濱垂釣
臣羞爲洛陽拜塵友

何卜賦

余旣幼惑力命之說今身久放而愈疑心回穴其莫曉今
將取質夫秉龜楚人俗巫而好術兮叟有鬻卜而來思乃
招而訊之曰嘻人莫不塞有時而通伊我今久而愈窮人
莫不病有時而閒伊我今久而滋蔓吾聞人肖五行動止
有則四時轉續變於所極一歲之旱人斯具舟三月之熱
人斯具裘極必反焉其猶合符子首圓而足方子腹陰而
背陽胡形象之有肖而變化之殊常經曰剝極則賁居賁
而未嘗剝者其誰否極受泰居否而未嘗泰者又其誰鶴

胡不截鳧胡不裨夔何罰而蹠蹠虻何功而扶持紛紜恣
睢交作舛馳似與似奪似信似欺孰主張之問於子龜卜
者曰招我以羈問我以微有天下之是非有仁人之是非
在此爲美兮在彼爲蚩或昔而成或今而虧君問曷由主
張其時時乎時乎去不可邀來不可逃淹兮闕孰舍孰操
豕喙之毒堇雞首之賤毛各於其時而伯其曹屠龍之伎
非曰不偉時無所用莫若履狶作俑之工非曰可珍時有
所用貴於斲輪絡首縻足兮驥不能跬前無所阻兮跛鼈
千里同涉於川其時在風沿者之吉汧者之凶同藝於野

其時在澤伊穉之利乃穆之厄故曰是耶非耶主者時耶
諒淑惡之同出今顧所卜之若何夫如是得非我美失非
我恥其去曷思其來曷期姑蹈常而俟之夫何卜爲言訖
執龜而起予退而作何卜賦於是蹈道之心一而俟時之
志堅內視羣疑猶冰釋然

傷往賦有序

人之所以取貴於蜚走者情也而誕者以遣情爲智豈至
言耶予授室九年而鰥痛苦若人之天閼弗遂也作賦以傷
之冀夫覽者有以增伉儷之重云

歎獨處之悵悵兮憤伊人之我遺情可殺而猶毒境當歡
而復悲人或朝歎而暮息夫何越月而踰時太極運乎三
辰轉寒暑而下馳有歸於無兮盛復於衰猶昧爽之必暮
又安得而怨咨我今怨夫若人兮曾旭旦而潛暉飄零日
及之萼倏忽蜉蝣之衣川走下而不還露迎陽而易晞恩
已甚兮難絕見無期兮永思我行其野農民桑者舉桉來
饁亦在林下我觀於途裨販之夫同荷均挈荆釵布襦羽
毛之蕃鱗介之微和鳴灌叢雙泳漣漪薨薨伊蟲蠢蠢伊
豸遊空穴深兩兩相比何動類之萬殊必雄雌而與俱物

莫失儷以孤處我方蹢蹢而焉如我復虛室目淒涼兮心
伊鬱心伊鬱兮將語誰坐匡牀兮撫嬰兒何所丐沐兮何
從仰飴襦袴在身兮昔圍蹉跌聲囊附臂兮餘馥歲蕤誠
天性之潛感顧童心兮如疑嘒然有難繼之慕漠然減好
弄之姿指遺桂兮能認慙空帷兮欲歸我入寢宮痛人亡
兮物改其容寶瑟僵兮絃柱絕瑤臺傾兮鏡匱空寒爐委
灰虛幌多風隙駒晨轉窗蟾夜通步搖昏兮網粘翡翠芳
褥掩兮塵化蛭蝨閱刀尺之餘澤見巾箱之故封翫服儼
兮猶具繁華謝兮焉從想翩翩於是非求憲宰與冥蒙信

奇術之可致嗟此生兮不逢徒注視以寂聽恍神疲而目
窮還抱影以獨出紛百哀而攻中系曰龍門風霜苦別鶴
哀鳴夜銜羽吳江波浪深雌劍一去無遺音悲之來兮憤
予心洵如行波洊浸淫悵緣情而莫極思執禮以自箴已
焉哉苒苒生死悠悠古今乘彼一氣兮聚散相尋或鼓而
興或罷而沈以無涯之情愛悼不駐之光陰諒自迷其有
分徒終怨於匪忱彼蒙莊兮何人予獨累歎而長吟

平權衡賦

以晝夜平分鈞
銖取則爲韻

惟天垂象惟聖作程播二氣而是分晷度立五則而在審

權衡上穆天時應陰陽之克正下統人極俾準繩而惟平
於是黍累無差毫釐必究等度量而化通遠邇體平均而
勢行宇宙當其夾鍾中律南呂戒候銅渾應節於寒暑玉
漏方齊乎宵晝絲是命有司而申令考前王而是遵權輕
重以審則中規矩而和鈞事垂文今風傳乎千古道如砥
今日用於兆人懿夫正以處中平而立矩命其同也有虞
之制克彰稱其謹焉宣父之言可取故能用該仁里象合
天文既左旋而右折量輕併而重分持平罔虧可爲範於
秉鈞之佐立信惟一將有助於執契之君不然則何以懸

之而息彼姦詐正之而協於晨夜得平則正我之道兮允
執厥中益寡裒多眾所用兮不言而化化之有孚功莫可
踰立規程罔慙夫龜鏡揣鈞石寧失乎錙銖匪假垂鈞而
其用不匱何勞剖斗而所爭自無方今百度惟貞萬邦承
則順時設教兮靡不獲所同律和聲兮允臻其極玉衡正
而三階以平七政齊而庶政不忒矣美君臣之同體猶權
衡以合德宰準繩之在心庶輕重之不惑

砥石賦

有序

南方氣泄而雨淫地慝而傷物媪神噫濕渝色壤味雖金

之堅亦失恆性始予有佩刀甚良至是涇不可拔剖其室
乃出遡陽眇眇傳刃蒙脊鱗然如瘡痂如黑子如青蠅之
惡銳氣中錮猶人被病然客有聞焉裒密石以遺予沃之
草腴雜以烏膏切剗下上真質焯見躊躇四顧迨爾謝客
微子之胎幾喪吾寶客曰吾聞諸梅福曰爵祿者天下之
砥石也高皇帝所以礪世磨鈍有是邪予退感其言作砥
石賦

我有利金今以利爲佩遭土卑而慝作兮雄芒爲之潛晦
如景昏而蝕旣兮與肌漆而爲厲顧秋蓬之不可剗兮尚

何遊乎髀髀之外利物蒙蔽材人惆悵俾百汰之至精蟠
一檢而多恙豈害氣之獨然兮將久不試而然彼屠者之
刀兮獵者之鋌不灌不淬兮糝錯銜鉛日鼓月揮兮剖腴
擊鮮睨燿燿以耀芒瀚淫夷而騰羶豈不以涉暑而蒙沴
兮鼎用之而成妍有客自東遺予越砥圭形石質蒼色膩
理刻其鱗皴滑以滌澣如衣澣垢如鼎出否霧盡披天萍
開見水拭寒醎以破背擊清音而振耳故態復還寶心再
起旣賦形而終用一蒙垢焉何恥感利鈍之有時兮寄雄
心於瞪視嗟乎石以砥焉化鈍爲利法以砥焉化愚爲智

武王得之商俗以厚高帝得之傑才以奏得既有自失豈
無因漢氏已還三光景分隨道濶狹用之得人五百餘年
唐風始振懸此大砥以礪兆民播生在天成器在君天爲
物天君爲人天安有執礪世之具而患乎無賢歟

山陽城賦

有序

山陽故城遺趾數雉四百之運終於此墟裔孫作賦蓋憫
漢也辭曰

我止行車實涕於山陽之墟是何蒼莽與慘悴春陵之氣
兮焉如踣昌運於四百辟至尊而伍匹夫有利器而倒持

兮曾何銚刃之足舒懿王迹之肇基暨坤維之再敷邈汜
陽與鄣土恍蛇變而龍攄痛人亡而事替終此地焉忽諸
嗟乎積是爲治積非成虐文景之欲處身以約播其德芽
迄武乃穫桓靈之欲從心於昏蕪其妖醖逮獻而焚彼伊
周不世兮姦雄乘釁而騰振物象摧以易位被虛號而陽
尊終勢殫而事去胡竊揖讓以爲文嗚呼維神器之至重
兮蓋如山之不騫使人得譬乎逐鹿固健步者所先諒人
事之云爾孰云當途之兆也自天亂曰久矣莫可追升彼
墟兮噫嘻獨遺武兮貽後王之元龜

楚望賦 有序

予旣謫於武陵其地故郢之裔邑與夜郎諸夷錯雜繫乎
天者陰伏陽驕繫乎人者風巫氣麻是以囂霧浮浮利於
樓居城之麗譙實鄰所舍四垂無蔽萬景全入因道其遠
邇所得爲楚望賦云

翼軫之野祝融所司陰迫而專專實生沴天濡而零土洩
而泥氣罕淑清兮淫氛瞢瞢中人支體兮爲瘡爲瘵以曠
滌煩兮利居高於物外我卜我居於城之隅宛在藩落麗
譙渠渠四阿垂空洞戶發樞眸子不運坐陵虛無歲更周

流時極慘舒萬象起滅森來貺予櫺軒之外羣山龍從岡
陵靡阨勢若相拱出雲見怪竊蔚森聳露夕霞朝望如飛
動簷廡之下大江湏洞支流合輸泄入雲夢羲和望舒出
沒兩涯涵泳之族聳聳歔呀秋水灌盈漩石飄沙流枿軒
昂舞於盤渦逮及收潦澹如醪醕白石磷磷倒影羅生蘋
末風起有文無聲悠遠烟絲與空蒼然湘沅之春先令而
行臘月寒盡溫風發榮土膏如濡言鳥嚶嚶三星嘒其曉
中植物颺以飄英雲歸高唐草蔽洞庭目與天盡神將化
并圓方相函遊氣杳冥熙熙藹藹藻飾羣形枿樹童邱積

空凝青環洲曲塘含景曜明恢台之氣發於春季涉夏如
鑠逮秋愈熾土山焦熬止水漢沸翔禽跼墮呀喙垂翅曦
赫歆蒸陽極召陰二儀交精下上相歆雲興天際歛若車
蓋凝臚未瞬彌漫霍霽驚雷出火喬木糜碎殷地熱空萬
夫皆廢懸雷綆縋日中見昧移晷而收野無完塊少陰之
中景物澄鮮丹葉星房燭耀川原夕月旣望曜於丹泉上
鏡下冰湔塵濯烟宿麗潛芒獨行高躔皓一氣之悠悠潔
有形而溢清元杳微明以斐疊想遊目於化先夜無朕以
徂征金霞暈乎海壖明星方揚斜漢西懸璿柄如墮半沈

層瀾雞啁晰而晨鳴兮日荏苒以騰晶動植瞭兮已分山
川鬱乎不平復人寰之誼卑洵浩浩以營營追向時之景
光不可驟得以再更意華胥之夢還猶仿像而馳精日次
於房天未降霜百卉猶澤水泉收脈故道脰削衍爲廣斥
水禽嬉戲引吭伸翮紛驚鳴而決起拾綵翠於砂礫於時
北風振槁揚埃蕭條邊聲與雁俱來寒氛委積萬竅交激
楚雲改容飛雨凝滴灑林遮響淅瀝梢槭飛電照雪以騰
光柔蔬傲霜而透圻躔次殊氣川谷異宜民生其間俗鬼
言夷招三閭以成謠德伏波而構祠投粃粃以鼓櫂參鱸

魴而如犧蟠木覲深孽妖憑之祈年去厲蠲敬祇威擊鼓
肆筵河旁水湄薦誠致祝卻略躩踞渚居鱸食大掩水物
罟張餌啗不可遁伏顯舉潛緹晝撞夜觸設機沈深如拾
於陸彼游鯈之瑣類咸跳脫於窘束雖三趾與六眸時或
加乎一目亦有輕舟軒輊汎浮沓綸往復馴鷗相逐暮夜
澄寂嘯歌羣族愴音俚態幽怨委曲逗疎析於江城引哀
猿於山木巢山之徒枰木開田灼龜伺澤兆食而蟠鬱攸
起於巖阿騰絳氣而蔽天熏歇雨濡穎垂林顛盜天和而
藉地勢諒無勞而有年罷士閑人逸爲末作求金渚洙洳

汰灋潏流注潰沱繁光熠燿貪賈來貿發於懷握無翼而
飛潤於豐屋哂耘耕之悒悒徒胼胝以自鞠我處層軒日
星迴環閱天數而視民風百態變見乎其間非耳剽以臆
說今固幽求而縱觀觀物之餘遂觀我生何廣覆與厚載
豈有形而無情高莫高兮九閭遠莫遠兮故園舟有楫兮
車有轄江山坐兮不可越吾又安知其所如悅臨高以觀
物

秋聲賦

有序

相國中山公賦秋聲以屬天官太常伯唱和俱絕然皆得

時行道之餘興猶有光陰之嘆况伊鬱老病者乎吟之斐然以寄孤憤

碧天如水兮宵宵悠悠百蟲迎莫兮萬葉吟秋欲辭林而蕭颯潛命侶以啁啾送將歸兮臨水非吾土兮登樓晚枝多露蟬之思夕草起寒蟬之愁至若松竹含韻梧楸蚤脫驚綺疏之曉吹墮碧砌之涼月念塞外之征行顧閨中之騷屑夜蛩鳴兮機杼促朔雁叫兮音書絕遠杵續兮何冷落虛窻靜兮空切切如吟如嘯非竹非絲合自然之宮徵動終歲之別離廢井苔冷荒園露滋草蒼蒼兮人寂寂樹

械械兮蟲吟吟則有安石風流巨源多可平六符而佐主
施九流而自我猶復感陰蟲之鳴軒嘆涼葉之初墮異宋
玉之悲傷覺潘郎之么麼嗟乎驥伏櫪而已老鷹在韝而
有情聆朔風而心動盼天籟而神驚力將殄兮足受絀猶
奮迅於秋聲

三良冢賦

有序

魯文六年秦伯任好卒以子車氏之三子奄息仲行鍼虎
爲殉皆秦之良也國人哀之爲之賦黃鳥君子曰秦穆之
不爲盟主也宜哉先王違世猶胎之法而况奪之善人乎

是以知秦之不復東征也秋季月吾西遊汧渭出於岐雍之間於古道傍得三良冢心甚哀之涕泗者久之而去辭曰

昨宿岐城曉涉渭東霜凌雪結飛沙亂蓬中野躊躇屈此古墟野人曰卽車氏之冢方驅駕班如久而咤曰吾嘗讀舊史矣古者秦氏大於穆公出師則寧東夏用賢則霸西戎大邦服其禮小邦畏其雄謀已集戰亦武不能勤王不爲盟主者何居以滅天之良喪人之特百夫仰系一朝而踣可哀也哉宛其三子遭時迍遭主已卽世身皆靡全指

冥茫而爲期撫昭世而坐捐方惴惴以臨穴且哀哀而號
天闕從有言於寒原莽蕩千里迴眺無垠上刺衰德下傷
幽魂挂驂壠樹脫劍山門掇野芳以爲薦汲行潦而充樽
矧今情之猶悲諒古恨之潛吞死而不作吾誰與言代事
浩漻人壽爾天言念君子中心悄悄哀生人之長慟赴永
夕之莫曉歸去來兮不可留且悲吟於黃鳥

謫九年賦

古稱思婦已歷九秋未必有是舉爲深愁莫高者天莫濬
者泉推以極數無踰九年伊我之謫至於數極長沙之悲

三倍其時廷尉不調行當跂而天有寒暑閏餘三變朝有
考績明幽三見顧堯之民兮亦昏墊而有嘆歎息兮徜徉
登高高兮望蒼蒼突弁之夫我來始黃合抱之木我來猶
芒山增昔容水改故坊童者鬱鬱兮涸者洋洋天覆地生
蓊兮無傷彼族而居羈之投荒彼軒而遊昨日析楊信及
澤濡俄然復常稽天道與人紀咸一僨而一起去無久而
不還夢無久而不理何吾道之一窮兮貫九年而猶爾噫
不可得而知庸詎得而悲苟變化之莫及兮又安用夫肖
天地之形爲

問大鈞賦有序

始余失臺郎爲刺史又貶州司馬俟罪朗州三見閏月人咸曰數之極理當遷焉因作謫九年賦以自廣是歲臘月詔追明年自闕下重領連山郡印綬人咸曰美惡周必復第行無恤歲杪其復乎居五年不得調歲二月有事於社前一日致齋孤居慮靜滯念數起伊人理之不可以曉也將質諸神乎謹貢誠馳精敢問大鈞其夕有遇寤而次第其辭以爲賦

圓方相函兮浩其無垠宵冥翕闢兮走三辰以騰振孰主

張是兮有工其神迎隨不見兮強名之曰大鈞歆以臨下
兮巍乎雄尊天爲獨陽高不可問工居其中與人差近身
執其權心平其運循名想像或可以訊曰嘻蒙之未生其
猶泥耳落乎埏埴惟鈞所指忽然爲人爲幸大矣工賦其
形七情與俱嗇智不受畀之以愚坦坦之衢萬人所趨蒙
一布武化爲畏途人或譽之百說徒虛人或排之半言有
餘物壯則老乃惟其常否終則傾亦不可長老先期而驟
至兮否踰數而叵量雖一夫之不獲兮亦大化之攸病謹
薦誠上問兮俛伏以聽是夕寢熟夢游乎無何有之鄉抗

陞級乎重霄兮異人間之景光中有威神巾金甲而煒煌
命之使前兮其音琅琅曰吾大化之一工也居上臨下廉
其不平汝今有辭吾一以聽播形肖貌生類積億橐籥圉
匡鎔鍊消息我之司智初不爾嗇不守以愚覆爲汝賊旣
賦汝形輔之聰明盍求世師資適攸宜胡然抗志遐想前
烈倚梯青冥舉足斯跌韜爾智斧無爲自伐鑿竅太繁天
和乃洩利逕前誘多逢覆轍名腸內煎外火非熱今哀汝
窮將厚汝愚剔去剛健納之柔濡塞前竅之傷瘕兮招太
和而與居貫以待人兮急以自拘道存壺奧無示四隅軋

物之勢不作兮見傷之機自無汝不善用吾焉嗇乎且夫
貞而騰氣者膺膺健而垂精者昊昊我居其中猶輪是蹈
以不息爲體以日新爲道俛鱗蜚走灌莽苞阜乃牙乃甲
乃殛乃剖陽榮陰悴生濡死槁各乘氣化不以意造賦大
運兮無有淑惡彼多方兮自生醜好爾奚不德余以驟壯
姑尤我以速老耶觀汝百爲又或不然赤子哇哇忽其能
言亦旣名物幾時踳蹢春耕其邱投種之日釋耒而嘆何
時實栗望所未至謂余舒舒欲其久畱謂我瞥如我一子
二誰之曲與彼蒹葭之蒼蒼兮霜霰苦而中堅松竹之皴

皴索籜兮不若櫛筍之可憐納材輦而構明堂兮固容消
而力完揚且之哲兮不可以常然當錫爾以老成蒼眉皓
髯山立時行去敵氣與矜色兮噤危言以端誠俾人望之
侮黷不生爾之所得孰與壯多不善處老問余而何授教
而迴遽遽形開嚮之威神孰爲來哉乃遽衣促盤端慮滌
想委佩低簪持簿叩顙而言曰楚臣天問不訓今臣過幸
一獻三售始厚以愚終期以壽忘上問之罪濯已然之咎
心增故術腹飽新授馳神清元拜手稽首

授倉部郎中制

敕周制倉人以辨於邦用廩人以待乎匪頒後代或均輸
或平糴皆周官倉廩之職也於戲王者藏於天下吾何私
焉收斂以時儲蓄必謹俾夫凶荒無患貧富克均宜味京
坻之詩勿守豆區之限可

授主客郎中制

敕漢制尚書郎四人一人主營部成帝又置客曹主外國
戎狄事皆今主客之任也其後或東西列職左右分名統
彼行人之家綏其外臣之務朝聘則定位宴會則辨儀穆
我四門深於九譯用委藁街之政克資粉署之賢可

授比部郎中制

敕周以司會質歲成漢以計相經國用或考百官之要或制三年之期稽以簿書辨其名物俾夫會算必得經費無差充選望郎以臨計吏可

授屯田郎中制

敕詩云雨我公田遂及我私蓋美大田之盛思賢主之詩人必先公而後私者借力而耕其來尚矣周以司徒莅職漢以侍郎訓田今則務切如雲任專列宿總於豫政克藉公才可

擬太子太傅制

敕太子太傅古今之重任也其使吾子目見正事耳聞正道左右前後無非正人繫爾太傅之力久虛其位式佇端人以爾命之朕無慚德可

擬太子太保制

敕禮云三王之教太子入則有保出則有師是以教諭而德成也其實一焉必擇恭敬溫文以輔道其德使吾太子觀爾之道景行之無人則虛不求充位校德而命其稱厥官可

金部金部金部金部

子

欽定全唐文卷六百目錄

劉禹錫二

擬冊皇太子文

擬冊齊王文

擬冊楚王文

擬冊邠王文

擬冊晉王文

擬公主冊文

賀冊太皇太后表

賀冊皇太后表

賀登極表

代李相公賀登極第一表

代李相公賀登極第二表

賀冊皇太子表

蘇州賀冊皇太子表

爲裴相公賀冊魯王表

蘇州賀皇帝疾愈表

賀改元赦表

賀赦表

賀德音表

連州賀赦表

賀赦表

賀收蔡州表

代京兆李尹賀遷獻懿二祖表

爲京兆李尹賀雨表

爲京兆韋尹賀元日祥雪表

爲京兆韋尹賀春雪表

爲京兆韋尹賀雨止表

爲京兆韋尹賀祈晴獲應表

爲杜相公賀復吳少誠官爵表

爲杜相公賀除虔王表

賀雪鎮州表

賀平淄青表

賀臬斬鄭注表

慰國哀表

慰淄王薨表

欽定全唐文卷六百

劉禹錫二

擬冊皇太子文

維某年月日皇帝若曰於戲易云明兩作離大人以繼明
照於四方蓋所以毓其明德繼於正體邦本由是固萬方
由是寧粵祖宗之闡帝業亦莫不由此而繼於明德肆予
一人緒承大寶纂奉丕構懼有失墜以貽先帝之羞永懷
主器以繼明用副予不德咨爾元子王某襲列聖之姿體
健行之質吹銅稟異辨日耀奇早習德成克敬師保事業

可大和順積中天縱溫文生知孝悌洎分茅土望出東平
符彩昭彰禮樂文錯固可正位重震爲天下之儲君人神
叶從德任相稱仰稽令典光載盛儀是用冊命爾爲皇太
子往欽哉夫富貴莫大於家天下忠孝莫大於敬君親俟
爾一人貞於萬國必咨正事必近正人必杜逸遊必樂善
道求諫如不及惡佞如探湯懋爾厥修惟懷克和以貳於
朕躬無忝祖宗之烈可不慎歟

擬冊齊王文

維某年月日皇帝若曰啟茲東國境於青州略嶠夷導濰

淄鹽絺貢庭罌絲入筐粵在少昊爲爽鳩之域沃若殷商
乃薄姑之邱周實太公之國積海岱之饒習戎革之盛因
俗簡禮其政易成咨爾第二子某直諒多聞溫裕有立樂
於爲善力其未能行本貞廉言依忠孝固可錫茲青社俾
藩於東是用命使某官某乙持節冊命爾爲齊王往欽哉
宜聽朕命夫敬人可以理國後已可以得人謂已不明任
賢良以爲明謂已不德資師傅以爲德國安則備爾忠孝
人散則忝爾君親慎乃厥修無替休命

擬冊楚王文

惟某年月日皇帝若曰衡嶽峙靈雲夢潤德錫十朋以備
神物包三脊以供王祭浮江潛漢實曰渚宮俗輕而佻上
難其化咨爾第三子某正性自得懿行克修曠淡居心寬
裕推已移此成器綏於荆蠻錫爾赤社以屏南土是用命
使某官某乙持節冊命爾爲楚王往欽哉宜聽朕命於戲
布政在寬革俗先信分吾之憂以惠黎庶勵爾之志以報
君親爲子爲臣克忠克孝臻於二德在理一邦祗敬勿休
無忝我命

擬冊邠王文

惟某年月日皇帝若曰朕讀詩至豳風見古公亶父之跡
然後知王業之難仰惟我高祖太宗之櫛沐風雨以啟天
下是用兢惕若墜泉谷豳之舊地積德之餘俗厚而忠人
悅其上王於茲土克懋賢戚咨爾第四子某質重性和神
清氣茂威儀儼若恬淡寡言介然風規坐鎮流俗固可將
吾勤儉宣化豳郊錫爾白社藩於西土是用命使某官某
乙持節冊命爾爲邠王往欽哉宜聽朕命於戲播種者后
稷公劉之業善繼者古公亶父之志積德行義國人戴之
詩有七月之章非惟王業艱難亦俗阜化成之風也爾其

日夜思之訓以溫柔之教無奪農時使獨戴周德以忝我一人之命

擬冊晉王文

維某年月日皇帝若曰涉河之東千里而廣右浸衡水左據常山蒲阪唐堯所封之邱厯山虞舜隱耕之地晉陽我高祖誓眾之野本晉國也而謂之唐其人憂深思遠有帝堯之遺風焉故我國家因之以啟王業將我朝政保茲舊邦克建威藩以任賢德咨爾第五男某和裕秉質端貞理身撫謙似不能好善如不足行歸於厚口無擇言本孝克

家資忠體國固可嚴奉啟聖之域綏懷積德之邦錫爾黑
社以藩於北是用命使某官某乙持節冊命爾爲晉王往
欽哉宜聽朕命於戲踐唐堯之地理虞舜之人開高祖之
域爾其兢兢底慎以臨其人思流愷悌之風祇敬興王之
地無一舉足以忘我祖宗艱難之業往利厥土以孚於休

擬公主冊文

惟某年月日皇帝若曰桃李發詠雲日連輝禮秩克柔肅
雍載美築館大國建號名邦乃躅通規用光懿範咨爾長
女金枝寵愛玉質輝奇蘊異體和含章挺秀柔順懿德幽

稱賀闕庭無任抃躍屏營之至

賀冊皇太后表

臣某言伏見制書以二月二十五日冊立皇太后盛禮畢
陳德音遠被一人有慶萬國同歡中賀伏惟皇太后稟靈
作合誕聖表祥徽號極域中之尊至仁爲天下之母陛下
君臨有國子道無違長樂宮中永獻南山之壽濯龍門上
再揚東漢之風率土臣子不勝歡抃臣遠守荒服不獲稱
慶闕庭無任踊躍屏營之至

賀登極表

臣某言伏見詔書正月二十六日皇帝陛下嗣登寶位萬國同歡日月繼明乾坤交泰中賀伏惟皇帝陛下欽承顧命惟懷永圖以大孝奉宗祧以至仁蘇品物洞照寰海統和神人聖祚延長從今無極羣生鼓舞自此大寧臣限守遐藩恪居官次不獲奔馳拜舞稱賀闕庭無任抃躍屏營之至

代李相公賀登極第一表

臣某言臣伏聞陛下式遵典章正位宸極臣聞大明繼照雖昧者必昭其視震雷發聲雖聵者必達其聽是以聖人

鼓萬物而耳目咸革感人心而天下太平致理興邦率由
茲道中賀伏惟陛下紹累聖之鴻緒冠前主之盛烈祥符
薦委景福攸臻纂武繼文重光累洽自宣猷上嗣育德儲
闡仁孝表於域中慈儉章於天下由是餒者思食瘠者思
豐習爽咸耀於光明枯朽更延於惠澤禹禹億兆咸沐惟
新鼓舞而四表歡心運行而二儀貞觀臣夙承朝獎謬列
藩條歡抃之誠倍萬恆品

代李相公賀登極第二表

臣某言臣聞帝堯之禪虞舜也業歸乎異代漢祖之尊太

上也禮徇乎虛名有棄屣而傳七廟之重斯則堯圖非遠
漢道未全卓哉冠鴻名而超古始者孰若今之盛也陛下
孝至通三上極於君父德均吹萬下被於生靈大聖所以
宣昭庶品由其利見聖作物覩天清地平故雖冰霰傷和
之姿人情慢蔽之物宿陰茲解惡氣未除無不仰南至而
自銷隨東風而盡變坐見可封之俗更覃無外之恩率土
之眊俱霑覆育稟靈之內無不謳吟遐邇歡康昭聾發瞽

臣謬忝朝列久總藩條

云

賀冊皇太子表

臣某言伏見制書以十二月二十日冊皇太子盛禮斯畢
德音遐宣萬國以貞庶類咸說中賀伏惟文武孝德皇帝
陛下體元立極垂訓御時旣闡王猷思安國本前星位定
拱宸極以昭彰蒼震氣宣與天地而長久禮光七鬯澤被
華夷宗祏有無疆之休生靈懷莫大之慶臣恪居官次遐
守巴南不獲稱慶闕庭無任踊躍屏營之至

蘇州賀冊皇太子表

臣某言伏奉制書以今月十日冊皇太子德音遐布盛禮
畢陳國本永安人心同慶伏惟皇帝陛下以繼天之聖有

知子之明義兼君親禮重宗祏龍樓肇建展嘉禮於三朝
鳳厯延長固本枝於萬葉臣守在遐郡不獲稱慶闕庭無
任踊躍屏營之至

爲裴相公賀冊魯王表

臣某言伏見制書以今日冊魯王禮畢皇家有慶寶祚
無疆旣榮本枝克固磐石伏惟皇帝陛下德符列聖道冠
前王孝敬承兩宮之歡虔恭奉九廟之祀先崇大禮慶浹
天人次念建封事兼家國伏以魯王夙承睿訓特稟天姿
爰擇吉辰光膺寵冊旣示之以君親之道又錫之以禮義

之邦寰海聞風室家相慶臣自嬰疾疹已厯旬時不獲展禮明庭拜舞稱賀

蘇州賀皇帝疾愈表

臣某言臣得本道觀察使報伏承聖躬痊愈已於紫宸殿視朝者一人有慶萬國同歡伏惟皇帝陛下外親萬務內奉三宮常懷宵旰之勤遂失寢興之適上元降祐列聖表靈百神奔走以來扶四海精誠而致感勿藥有喜如山永安宗廟保無疆之休寰瀛申莫大之慶臣恪居官次遐守江干不獲稱賀闕庭無任踴躍屏營之至

賀改元赦表

臣某言伏見今月七日制書大赦天下者帝遊出震聖澤如春神人以和天地交泰伏惟皇帝陛下丕承鴻業光闡徽圖吉日展嚴配之儀告天陳太平之盛九廟成禮百神降祥鑾輅旋衡風雲改色殊私廣被再宏莫大之恩寶厯惟新更啟無疆之祚兩宮承慶四海永寧率土臣子上千萬壽臣恪居官次不獲稱賀闕庭無任屏營之至謹差當州軍事衙官試慈州吉昌府別將徐倫奉表陳賀以聞

賀赦表

臣某言伏奉今月一日制書改大和十年爲開成元年大赦天下者雷雨作解人神悅隨澤及八荒網開三面臣某誠歡誠喜頓首頓首伏惟皇帝陛下上承乾綱下立人極用含宏光大之德副華夏會同之心獻歲改元惟新景祚先明首罪次及羣妖述睿情以曉萬方施鴻霈以蘇庶物恤刑宥過已責弛征郡縣之舊弊悉除賦稅之新規咸備停藩方節獻之禮以惠疲人迴推筦餘羨之財以資京邑命使展澄清之志察言求讜直之材弓旌賁於邱園粟帛頒於耆艾爰以初吉御於明庭德音一發於九天和氣驟

周於四海開物成務實表於建元應天順人永延於億載
臣幸居近輔先受殊恩不獲稱慶闕庭陪榮班次眾星列
位常拱北辰之尊新歲拜章遙獻南山之壽無任抃躍屏
營之至

賀德音表

臣某言伏見今月十六日德音布告遐邇天道下濟人情
大安中賀伏惟皇帝陛下凝旒思理垂衣擇材以日月無
私之光照寰區有截之內貴使下情盡達寧虞厚貌潛謀
一昨李訓鄭注等敢有逆心兼連兇黨陛下睿謀神斷羣

右協同頃刻之間掃除已定重臣畢力禁旅竭忠氛祲廓
清華夷咸悅言念正刑之外或有詿誤之徒再發德音廣
宣聖澤當星紀迴天之日迎陽和煦物之光懷危疑者如
山之安欲告訐者望風知懼非同謀者一切不問未結正
者三省從寬含生之倫普天同感臣恪居官次不獲稱賀
闕庭無任忭躍屏營之至謹差防禦知衙官朝議郎權知
容州都督府司馬孫惕奉表

連州賀赦表

臣某言伏奉今月一日制書大赦天下者盛德廣運浹於

華夷天光下臨照被幽蟄臣某誠歡誠躍頓首頓首伏惟
睿聖文武皇帝陛下神扶寶祚天贊鴻猷意有所之事無
不尅當淮甸凱旋之後是域中慶幸之時順陽和以發生
施霈澤於寰海網開三面危疑者許以自新耳達四聰瑕
累者期於錄用求碩畫於庶位慮遺材於放臣旌忠烈之
家賞勲庸之允仁及枯骨無隔於寇戎榮加顯親普霑於
存歿恤刑已責實廩蠲徭頒錫彰有客之詩崇儒叶宗子
之望嶽瀆咸秩者艾飲和大僚承任子之恩武旅荷賜金
之寵斯皆禹湯文武之遺美高祖太宗之耿光集於聖朝

然後大備德音所至和氣隨之歡謠上徹於九天福祚永
延於億載能使遠夷屈膝豈惟小醜革心率土人臣不勝
大慶臣久僻闕下恪守海隅犬馬之誠倍百恆品無任抃
躍屏營之至

賀赦表

臣某言伏見今月三日制書大赦天下者大明初昇萬物
咸觀渙汗一發神人以和伏惟皇帝陛下天資叡聖神啟
昌期端拱受萬國之朝承顏奉兩宮之慶初嗣大位克揚
孝心三光協明和氣來應臣伏讀赦令首於奉園陵盡誠

敬親九族蘇兆人次及定章程止進獻已逋責滌夙瑕內
照於九重則歸嬪嬙放鷹犬外明於四目則求隱士開直
聲柔遠以仁則還其係虜賞延以禮則澤及後昆非食遵
夏禹之規弋綈法漢文之儉墜典咸舉舊章再明昇平之
期正在今日發號之始疾於春風殊私所及霈若時雨臣
幸逢昌運厯事五朝出守遐藩僅垂二紀欣承霑雨作解
之澤不勝犬馬戀主之誠瞻望帝鄉無任屏營懇悃之至

賀收蔡州表

臣某言伏見詔書以唐州節度使李愬生擒逆賊吳元濟

獻俘文武百僚於興安門列班稱賀者天威遠被元惡就
誅一方旣平萬國咸慶中賀伏惟睿聖文武皇帝陛下德
超邃古道合上元臨御以來天人協贊削平吳蜀掃蕩塞
垣車書大同夷狄來貢叢爾元濟敢懷野心輒聚犬羊苟
偷時月陛下聖謨獨運睿感潛通天助神兵人生勇氣旣
擒兇逆爰正刑書伏三紀之逋誅成九衢之壯觀宗社昭
告華夷式瞻行弔伐而在禮無違烜威聲而何城不尅楚
氛改色淮水安流漢上疲人盡霑雨露汝南遺老重睹昇
平凡在具臣孰不欣抃臣久辭朝列忝守遐藩不獲稱慶

闕庭陳露丹悃仰瞻宸極倍萬羣情無任踊躍慶快之至

代京兆李尹賀遷獻懿二祖表

臣某言伏見詔書以今月某日奉遷獻祖懿祖神主祔於德明興聖皇帝廟盛禮云畢宗祧永安誠感誠悅頓首頓首伏以太祖景皇帝膺期撫運啟封於唐爲百代不遷之宗開三靈眷命之兆頃以本朝初建清廟備儀二祖冠西室之先景皇闕東向之位諸儒獻議厯載未行陛下濬發睿謨旁延正論爰詔多士會於中臺酌三禮之前文參百王之故事講貫斯定詢謀僉同備物展儀考祥視履配貴

神於遠祖正尊位於始封廟貌有嚴禘嘗尤穆示人以孝
得禮之中既觀秩秩之容必降穰穰之福臣職居內史屬
忝本枝躬導盛儀獲申誠敬無任感悅屏營之至

爲京兆李尹賀雨表

臣某言伏奉聖旨以時雨愆候有妨耕農應諸有靈跡處
並令祈請者德音才發膏雨驟飛滂霈已周動植咸說云
云伏以久愆時澤上軫聖慈爰命禱祈俾申誠敬神應如
響天且不違未興雲漢之詩已致桑林之雨臣謬司京邑
虔撫黎蒸覩豐年之可期同比屋而稱慶無任欣抃之至

爲京兆韋尹賀元日祥雪表

臣某言伏以去冬以來久無雨雪臣每於殿內親奉德音以宿麥未滋爲虞以兆人生疾爲念聖情所屬神理潛通獻歲發春佳雪肇降當夷夏會同之日觀天人合應之徵迎喜氣於三元浹歡心於萬國癘疵永息豐年可期臣以疾疢未平步趨有阻伏蒙恩貸已具奏聞謹於光宅寺中管當本務不獲隨例稱慶明庭旣覩嘉祥益彰聖德無任欣躍屏營之至

爲京兆韋尹賀春雪表

臣某言伏奉詔旨充某郡主禮命使謝恩之日親承德音以春初已來雨雪猶少慮妨農事有軫睿慈今當下嫁之辰克致上元之感雲生河漢及佳期而降祥雪滿寰區應豐年而呈瑞臣官當撫字職在肅雍慶抃之誠實倍常品爲京兆韋尹賀雨止表

臣某言今月某日中使吳文政奉宣聖旨緣今年雨多恐傷苗稼諸有靈跡處並宜祈禱者臣謹檢尋祀典方議徧祠惟德動天倏已澄霽伏以至教惠農兆人務本今歲宿麥茂於常年爰自季春遂逢多雨蓋陰陽常數有以推遷

而隴畝之間未聞傷敗陛下勞謙思切覆育恩深或慮成災先期軫念昭薦未陳於方社叡誠已格於上元文明煥開陰曠潛掃有年之慶實兆於茲辰先天不違實超於前代臣謬司京邑虔撫蒸黎欣抃之誠倍百羣品無任踴躍屏營之至

爲京兆韋尹賀祈晴獲應表

臣某言今月十七日中使某奉宣聖旨以霖雨未晴諸有靈跡處並令祈禱者臣當時於興聖寺竹林神親自祈祝兼差官城外分路徧祠伏以神祇效靈景物澄霽兆庶覩

動天之德大田俟多稼之期臣謬荷恩輝忝司京邑抃說之至實倍常情

爲杜相公賀復吳少誠官爵表

臣某言中使宋惟澄至奉宣聖旨存問兼賜臣墨詔及昭示洗雪吳少誠等事天地宏覆燾之恩雷雨施渙汗之澤瑕累咸滌危疑獲安中謝臣伏以少誠擅興兵戈事生詿誤自王師致討天威下臨曾無悖辭亟聞引咎初懷疑懼雖擁眾以偷生旋感聖神屢拜章而請命陛下仁深解網慮軫納隍念餽餉飛輓之勤閱戰爭暴露之苦舉茲宥過

之典副彼效順之誠一方承再造之恩九有覩惟新之化
敷鴻霈而覃及蠢類鼓仁風而臻於太和罷析銷鋒自茲
而始臣謬膺重寄虔守遐藩不獲稱慶瑤墀陳露丹懇仰
瞻宸極倍百常情無任慶抃屏營之至

爲杜相公賀除虔王表

臣某言中使李國真至奉宣聖旨存問兼賜臣墨詔鴻澤
浹下大明燭幽曉諭便藩慰安稠疊中謝臣伏覩天書恭
承睿旨宏愛人屈已之道酌因時適變之宜擇賢王作鎮
徐方俾張愔便主留務上則成邦家磐石之固下則副士

衆拜章之請戚藩之寄斯重舊勳之祀獲全丕變猖狂之徒咸躋仁壽之域旣宏在宥坐見止戈率土人臣孰不欣說臣素乏方略謬荷寵光猥塵將相之名無施分寸之績遭逢若此報效蔑聞官謗已興渥刑宜及陛下恩深覆載道務舍宏恤公私餽餉之勤念吏士鋒鏑之苦特紆神算昭發德音危疑獲安制置惟固好生宥過誠陛下開網之仁尸位無功重微臣素餐之責周章跼蹐胡顏自安但以遐守藩條恪居官次不獲仰謝雲陛陳露血誠未遂周任知止之言敢逃臧文竊位之咎無任戰越之至

賀雪鎮州表

臣某言伏見四月二十七日德音以王承宗效順著明復其官爵所獻二郡別置藩垣聖德動天鴻恩及物瑕累咸滌蒸黎永安伏惟睿聖文武皇帝陛下自承寶位克振皇綱旣以四海爲家每念一夫不獲昨因大慶爰降殊私廣宥過之科開自新之路綸言一發神聖潛通遂令迷誤之徒頓釋憂危之慮命允子以入侍獻名都以效誠臣心旣明天綱爲解因析四郡別爲一方惟懷永圖盡去前弊大河以北化爲禮樂之鄉率土之濱重見昇平之日臣恪居

官次遐守嶺隅不獲稱慶闕庭無任踊躍屏營之至

賀平淄青表

臣某言伏見制旨魏博節度使所奏逆賊李師道并男二人並梟斬訖以二月十六日御宣政殿受賀者聖德元運兵威神速旬月之內鯨鯢就誅泰嶽旣寧登封有日伏惟歡聖文武皇帝陛下有征必克舉意無違天地協神算之期雷霆助成師之氣蠢爾孽豎敢生野心蕭斧一臨妖氛自滅皆由聖慈廣被叡略潛通獻俘者盡許生還得地者復令安堵感我仁化激其深衷凡是脅從盡思效節五紀

巢穴一朝蕩夷遂使齊魯之鄉復歸仁壽之域捷書既至傳首繼來備文物於明庭告殊勳於清廟百郡陳賀萬方會同從此止戈所以爲武西周士庶方觀飲至之容東嶽烟雲已望告成之禮臣恪居遠服嘗忝班行慶快之誠倍萬羣品無任踴躍屏營之至

賀臬斬鄭注表

臣某言伏奉前月二十五日詔書示逆賊鄭注已梟首訖妖氛殄滅華夏又安伏以逆賊鄭注本出細微潛懷梟獍之心兼結兇狂之黨人倫共棄神理不容陛下睿略感通

天人合應重臣協力禁旅齊心指顧之間猖狂自潰乾坤
交泰日月增明凡在人臣不勝慶快臣恪居官次不獲稱
賀闕庭無任欣歡抃躍之至

慰國哀表

臣某言上天降禍大行皇帝奄棄萬國奉諱號梓麋潰五
情伏惟皇帝陛下孝思至性攀號罔極臣恭守所部不獲
陪位西宮伏增感慕之至謹奉表陳慰以聞

慰淄王薨表

臣某言臣得進奏官楊惕狀報淄王薨輟朝三日伏惟皇

帝陛下德邁前王情深近屬憫枝葉之謝諒切宸衷割肌膚之愛何堪聖念萬方知化九族歸仁凡受國恩伏深悽惻臣限以藩守不獲奉慰闕庭無任屏營之至

欽定全唐文卷六百一目錄

新文豐出版社藏書

劉禹錫 三

爲杜相公慰王太尉薨表

爲杜司徒慰義陽公主薨表

爲杜司徒讓度支鹽鐵等使表

爲杜司徒讓淮南立去思碑表

爲杜相公讓同平章事表

爲裴相公讓官第一表

爲裴相公讓官第二表

爲裴相公讓官第三表

爲容州竇中丞謝上表

夔州刺史謝上表

連州刺史謝上表

和州刺史謝上表

蘇州刺史謝上表

汝州刺史謝上表

同州刺史謝上表

代杜司徒謝平章事表

爲淮南杜相公謝兵馬使朱鄭等官表

爲淮南杜相公謝貸錢物表

蘇州謝恩賜加章服表

謝差中使送上表

代杜司徒謝男授官表

欽定全唐文卷六百一

劉禹錫三

爲杜相公慰王太尉薨表

臣某言伏承成德軍節度使太尉兼中書令王武俊今月某日薨沒伏以武俊生逢昌時天授忠節奮揚義勇茂建勳庸秩冠朝端參變和於台鉉姻連戚里承嘉慶於雲霄榮掩華夷事高今昔方膺作翰之寄遽迫歸泉之期鼎臣云亡梁木斯壞伏惟陛下君臣義重存沒感深臨冊綬以興懷聽鼓鼙而軫念臣恪居官守奉慰無階悲慟之誠有

加常品謹遣某官某乙奉表陳慰以聞

爲杜司徒慰義陽公主薨表

臣某言伏承義陽公主薨伏惟聖懷傷悼增切伏以公主
妍姿令則冠絕天人稟教皇宮已挺柔嘉之德降嬪卿族
益彰貞粹之儀方期作範壺闈長榮邸第豈意遘茲短歷
奄謝昌辰慮陛下軫念未捐深慈莫遣有虧常膳罷設宮
懸臣子之情不任惕戀况聖凡禮異家國制殊伏願道齊
彭殤理達修短割肌膚之愛慰寰海之心率土人臣孰不
相慰無任懇款屏營之至

爲杜司徒讓度支鹽鐵等使表

臣某言伏奉制書授臣檢校司徒同中書門下平章事充度支及諸道鹽鐵轉運等使者臣久塵高位尸素已多更受新恩滿盈爲懼云云伏惟皇帝陛下紹登寶位光纂鴻猷擢用之間華夷聳聽况利權所在宜適變通國計是資須明輕重當至化鼎新之日是微臣遲莫之年將何以上副宸衷下成庶務進退惟谷冰炭在懷輒罄愚誠冀回天監陳力無補庶遵周任之言循涯若驚敢飾范宣之讓慙惶跼蹐倍萬常情謹奉表陳讓以聞

爲杜司徒讓淮南立去思碑表

臣某言伏見淮南節度使王鏐所奏當道將吏僧道耆老等請爲臣立去思碑伏奉聖旨允其所奏內惟菲薄聲績無聞祇荷恩私慙懼交至臣某誠惶誠恐頓首頓首臣伏蒙先朝過獎累典方隅頃鎮江都十有四載數周星紀水旱備經境接淮濱兵戈時起至於邑里羸免流離非臣所能悉稟聖化在唐堯可封之日奚假吏才當漢宣責實之時皆承詔旨王鏐與臣交代輒有上聞况以去思爲名慙無可紀之績伏以建碑示後甲令垂文苟非至公翻益貽

誚臣伏覽故事宋璟自廣州都督入拜尚書南海之人請
爲刊石璟自遜讓至於再三雖勒其文竟從降制著在國
史舉爲美談璟非苟榮人益見德臣才誠不逮心實慕之
伏乞聖慈賜寢前命情非飾讓義在徇公無任懇款之至
謹奉表陳讓以聞

爲杜相公讓同平章事表

臣某言高品吳千金至奉制加臣銀青光祿大夫同中書
門下平章事兼徐泗濠等州節度觀察處置等使餘如故
者初受恩榮若登霄漢退思塵忝如履春冰臣誠惶誠恐

頓首頓首臣聞以德詔官以勞定賞苟或虛授人無勸心臣自守方隅累更時歲荷唐虞宣力之寄乏齊魯報政之能愧無可稱以答高位豈意聖慈宏獎天澤薦加以變贊之崇名被庸虛之陋質懼速官謗有玷大猷伏以宰相之職安危是注其在當否繫於慘舒惟以材升例無平進舉不失德則副蒼生之心苟非其人或致外夷之哂臣雖愚昧嘗覽前言豈敢冒榮遂安竊位輒思事理冀盡芻蕘若以汴河要津漕運所切徐方俶擾師旅未寧謹當上稟叡謀下貞戎律克期而進屈指可平勵眾之先是臣之志既

行其事必在正名所加節制安敢飾讓至於銀青貴服金鉉重名勲績無聞豈宜濫及伏乞賜寢前命俯亮愚衷微臣遂知止之宜聖朝無不稱之服名器斯慎退讓有聞遐邇聆風孰不知勸其新授官告謹重封進無任懇禱屏營之至

爲裴相公讓官第一表

臣某言臣去冬得疾近日加劇西夕之景豈能久留及其未亂披露誠懇臣犬馬之齒六十有七壽雖不長亦不爲短位忝公台近十五年皆由際會非以才進常懼官謗以

招國刑今被病得死保其始終爲幸甚厚豈復咨嗟所恨者遇聖明之君不得佐成太平之化自量氣力忽恐奄然則有微素無階上達伏惟聖慈昭鑒憐而察之伏以三公非曠職之地宰相非卧理之官伏枕之初已有陳乞請罷直食兼辭貴階伏蒙優詔纔遂一事頻降中使慰勉再三專令御醫旦夕診視苟安名器不覺經時主恩則深公議不可伏思陛下臨御之始宰臣四人逮今零落忽已一半臣且危懼餘年幾何惟易直外鎮獨得無恙竊惟此理權位難居伏乞賜臣停官許在家養疾就閒辭祿或冀有瘳

害盈福謙固是神理儻天眷綢厚念以伏事多年臣之所
陳未蒙便遂則國朝勲舊以疾辭位者皆得以致仕使其
家居足以頤養既有成例著於舊章伏望天恩特賜哀允
爲裴相公讓官第二表

臣某言臣所獻章表發於至誠伏奉批答未蒙允許外負
公責內迫私情期於必遂敢守難奪臣束髮已來號爲強
力及其晚節亦未甚衰一朝被病遂至縣愒臣自思省得
其端倪非因飲食不節無有霧露之犯蓋由才微而任重
功薄而賞厚竊位旣久妨賢則多以積年之過幸致今日

之沈疾不能酌損所以生災悟雖已晚情實非矯伏惟陛下念其委使之久察其危苦之詞特降深恩救臣不逮無冒榮之咎得遂性之宜物議不形病心自泰忍死俟命披肝再陳伏乞聖慈俯賜容納無任迫切懇倒之至

爲裴相公讓官第三表

臣某言得病踰年在假三月再有陳請未蒙允從慮其奄忽銜愧入地伏惟聖慈哀而信之臣聞君之使臣在知其心而聽其言不以容尸祿爲惠也臣之事君在無隱情而盡忠節不以受非據爲榮也然後上下交感終始可詠臣

伏事陛下五年於茲葵藿微誠已蒙識察桑榆暮景所冀
哀憐豈令危懼之時更懼滿盈之禍雖有藥石安能調和
聖日雖逢生涯漸短體羸無拜舞之望心在有涕戀之悲
臣伏覽國史備見前事太宗朝李靖高宗朝劉仁軌皆自
宰臣乞骸致政其後知猶可用後起於家進退之間曲盡
情禮君臣之際良史美談伏望陛下悉臣至誠念臣羸病
許遂頤養以保餘年俟其有瘳或冀萬一無任懇款遑迫
之至

爲容州竇中丞謝上表

臣某言伏奉某月日制書授臣容州刺史兼御史中丞充
本管經略招討等使臣發開州日已差某官某乙奉表陳
謝伏以道途遐阻水陸縈紆臣以今月某日到本任上訖
謹宣聖旨慰諭遠人臣某中謝臣本書生素無吏術頃因
多幸賁自邱園累沐聖慈驟居清貫識昧通變動乖事宜
慙無善狀以塞公責伏惟睿聖文武皇帝陛下凝旒穆清
洞照寰海推共理之義分寄股肱念蒸人之勤溥霑遐邇
察臣前任事實恕臣本性朴愚賜以恩輝拔於廢棄遠辭
偏郡重委方隅捧印綬以爲榮望闕庭而增戀雖到官之

始惠未及人而率下之誠務先克己凡施政教皆稟詔條參以土宜遂其物性可行必守有弊必除使蠻夷生梗之風慕臣子盡忠之道力誠不足心實在茲伏乞聖明俯賜昭鑒無任感戴屏營之至

夔州刺史謝上表

臣某言伏奉某月日制書授臣使持節都督夔州諸軍事守夔州刺史跪受天詔神魂震驚伏惟文武孝德皇帝陛下垂衣穆清叡鑑旁達三統交泰百神降祥浹於華夷盡致仁壽臣家本儒素業在藝文貞元年中三忝科第德宗

皇帝記其姓名知無黨援擢爲御史在臺三載例遷省官
權臣奏用分判錢穀竟坐連累貶在遐方先朝追還方念
淹滯又遭讒嫉出牧遠州家禍所鍾沈伏草土禮經有制
羸疾僅存甘於畎畝以樂皇化伏遇陛下大明御宇照燭
無私念以殘生舉其彝典獲居善部伏感天慈臣卽以今
月二日到任上訖硃水千里巴山萬重空懷向日之心未
有朝天之路無任感恩戀闕之至

連州刺史謝上表

臣某言伏奉去年三月七日制授臣使持節連州刺史恭

承睿旨跪奉詔書皇恩重於邱山聖澤深於雨露朴弊失
次神魂再揚臣某誠歡誠懼頓首頓首臣性本愚拙謬學
文詞幸遇休明累登科第出身入仕並不因人德宗臨御
之時臣忝御史陛下龍飛之日臣忝郎官恭守章程勤修
職業權臣奏用蓋聞虛名實非曲求可以覆視跡卑易枉
無路自明亦緣臣有微才所以嫉臣者眾競生口語廣肆
加誣伏賴陛下至仁特從寬典舉以緣坐貶佐遐藩屢易
星霜頻經恩赦犬馬懷戀寢興匪寧惟讀佛經願延聖算
昨蒙詔命追赴上都隨例授官俾居遠郡在臣之分榮幸

已多伏荷陛下孝理宏深皇明照燭哀臣老母羸疾閔臣
一身零丁特降新恩移臣善郡光榮廣被母子再生凡在
人臣皆感聖德凡爲人子皆荷聖慈豈惟賤臣獨蒙恩造
不覺言極至於涕零昔殷王俯念於前禽且聞解網漢帝
有哀於少女爰命罷刑方之聖朝不足多尚感召和氣慰
安羣生非臣殞越所能上報伏以南方癘疾多在夏中自
發郴州便染瘴癘扶策在道不敢停留卽以今月十一日
到州上訖謹宣聖旨以示遠人恭述詔條所期安復無任
感恩戀闕之至

和州刺史謝上表

臣某言伏奉制書授臣使持節和州諸軍事守和州刺史
臣自理巴賓不聞善政恩私忽降慶抃失容臣某中謝伏
惟皇帝陛下丕承寶祚光闡鴻猷有漢武天人之姿稟周
成睿哲之德發言合古舉意通神委用得人動植咸悅理
平之速從古無倫微臣何幸獲覩昌運臣業在詞學早歲
策名德宗尚文擢爲御史出入中外厯事五朝累承恩光
三換符竹在分憂之寄祿秩非輕而素蓄所長效用無日
臣聞一物失所前王軫懷今逢聖朝豈患無位臣卽以今

金史卷之二十一
月二十六日到所任上訖伏以地在江淮俗參吳楚災旱
之後綏撫誠難謹當奉宣皇風慰彼黎庶久於其道冀彼
知方伏乞聖慈俯賜昭鑒臣遠守藩服不獲拜舞闕庭無
任懇悃屏營之至謹差當州軍事衙官章興奉表陳謝以
聞

蘇州刺史謝上表

臣某言伏奉制書授臣使持節蘇州諸軍事守蘇州刺史
始從郎署出領郡長承命若驚省躬增感臣某中謝伏惟
皇帝陛下受上元之眷佑揚列聖之耿光大康黎元慎擇

牧守德音每發品物咸蘇臣本書生素無黨援謬以薄伎
三登文科德宗皇帝擢爲御史在臺三載例轉省官永貞
之初權臣領務遂奏錄用蓋聞虛名惟守職業實無朋附
竟坐飛語貶在遐藩憲宗皇帝後知事情却授刺史凡歷
外任二十餘年伏遇陛下應運重光物無廢滯收拾耆舊
塵忝班行旣幸逢時常思展效在集賢院四換星霜供進
新書二千餘卷儒臣之分甘老於典墳優詔忽臨又委之
符竹分憂誠重戀闕滋深石室之書空留筆札金閨之籍
已去姓名本末可明申雪無路豈意聖慈宏納不隔卑微

面辭之日特許升殿天顏咫尺臣禮兢惶不敢盡言空懷
誠懇謝恩而出生光於九陌之間授訓而行布政於五湖
之外臣卽以今月六日到任上訖伏以水災之後物力素
空臣謹揚皇風慰彼黎庶臣聞有味之物蠹蟲必生有才
之人讒言必至事理如此古今同途了然辨之惟在明聖
伏惟陛下察臣此言則天下之人無不幸甚江海遠地孤
危小臣雖雨露之恩幽遐必被而犬馬之戀親近爲榮

汝州刺史謝上表

臣某言伏奉去年七月十四日詔書授臣使持節汝州諸

軍事守汝州刺史兼御史中丞充本道防禦使餘如故者
臣久居遠服戀闕常深忽降新恩近鄉爲貴承旨慶抃省
躬慙惶臣某誠歡誠喜頓首頓首伏惟皇帝陛下垂衣清
穆之中旁照震瀛之內車書所及動植咸安臣昨離班行
遠守江徼延英辭日親奉德音知臣所部災荒許臣到任
條奏恭承睿旨宣示羣黎減其征徭頒以賑賜伏蒙聖澤
救此天災疲羸再甦幼艾同感二年連遭水潦百姓幸免
流離交割之時戶口增長雖才術不足於事未周而憂勞
則深爲衆所悉臣本業儒素頻登文科帝命遽迴再領軍

金定全唐文 卷之二十一
郡卽以今月二十七日到州上訖謹當奉宣聖化慰彼蒼
生臨汝水之波朝宗尚阻望秦城之日迴照何時臣無任
感激屏營之至謹差防禦押衙韋禮簡奉表陳謝

同州刺史謝上表

臣某言伏奉去年十月二十二日制書授臣使持節同州
諸軍事守同州刺史兼御史中丞充本州防禦長春宮等
使恩降九重榮忝三輔承旨慶抃省躬慙惶臣某中謝伏
惟皇帝陛下丕承列聖光闡鴻猷氛祲掃除乾坤交泰臣
幸逢昌運累沐殊私空荷生成之恩寧酬雨露之澤卽以

今月二日到州上訖謹宣睿旨安慰蒸黎伏以本州四年
以來連遭旱損閭閻凋瘵遠近共知臣頃任蘇州之年亦
遭大水之後面辭之日親奉德音至於撫綏皆承聖教二
年之後百姓獲安今本部災荒物力困涸忝爲長吏敢不
竭誠卽須條疏續具聞奏臣恪居官次幸接王畿不獲拜
舞彤庭陳露丹慊犬馬懷戀寢興匪寧瞻魏闕之容朝天
尚阻望長安之路近日爲榮臣無任感激屏營之至謹差
防禦知衙官試殿中監楊克乂奉表陳謝

代杜司徒謝平章事表

臣某言臣伏蒙獎拔超踐鈞衡慮玷大猷昧死陳讓再奉
嚴旨不令固辭恩厚命輕位高責重中謝臣聞天下安危
注意將相處論道具瞻之地當總戎作鎮之權雖叶夢而
求無聞秉鉞之寄登壇以拜不兼調鼎之榮授受維艱伊
昔猶爾況臣庸瑣何以克堪陛下元造曲成大明私照俾
掌戎律復參廟謨寵光之命在臣已極毫髮之效於國何
施謹當罄竭微誠奉遵至教仗天威以懾不順敷聖澤以
遂羣生上分旰食之憂下塞素餐之責力誠不足心實念
茲伏乞皇明俯賜昭鑒臣恪居官次遐守藩維不獲伏謝

彤庭陳露丹慊心存闕下同犬馬之戀恩身在淮濱仰雲
天而結思無任懇悃屏營之至

爲淮南杜相公謝兵馬使朱鄭等官表

臣某言奏事官韋溫迴特蒙聖恩重賜朱鄭等官告宸象
昭回煥然下燭榮分右職光賁遐藩臣某中謝臣伏以朱
鄭朴忠爲心沈毅見色當建封禦侮之寄見張愔提孩之
年昨者隸職徐州分鎮蘄縣驛騷之際梗亮彌彰厯險而
前實繁其旅詳探本末有足褒稱輒具奏聞恐須獎勸伏
蒙睿鑒俯亮微誠優詔先行已階直指之列殊私薦至超

升獨坐之崇戶領三千爵踰五等恩生非次感異常倫轅
門有光武旅增氣遂使感激之士希勇爵以捐軀猖狂之
徒聆聖澤而悛性風行草偃其勢必然臣忝總戎倍百欣
荷

爲淮南杜相公謝貸錢物表

臣某言中使南宮懷珍至奉宣聖旨存問兼賜臣墨詔天
光下濟睿澤曲流銜恩未酬居寵彌懼臣某中謝臣受任
斯極微功莫施昨以封略未寧干戈猶動壽春固壘以備
盜淮甸興師以扞姦經費所資數盈鉅萬餽餉時久供億

力殫慮始圖終不敢緘默輒陳管見上黷宸聰伏蒙聖慈
特遂誠請遠承如綽之旨特假聚人之財軍須不愆士氣
彌振糗糧既備永無半菽之虞襦袴足頒遠起挾纊之感
是爲悅使咸願先登臣忝總戎倍百欣荷伏以上分國用
俯濟軍興候清煙塵謹備償納

蘇州謝恩賜加章服表

臣某言伏奉去年十一月二十七日詔書加臣賜紫金魚
袋餘如故者恩降重霄榮霑陋質旣黷陟明之典恐興彼
已之詩寵過若驚喜深生懼臣某中謝臣起自書生業文

入仕德宗朝爲御史以孤直在臺順宗朝爲郎官以緣累
出省憲宗皇帝後知其冤特降敕書追赴京國緣有虛稱
恐居清班務進者爭先上封者潛毀巧言易信孤憤難申
俄復一麾外轉三郡伏遇陛下膺期御宇大振滯淹哀臣
宿舊猥見收拾職兼書殿官忝儀曹微勞未宣薄命多故
又離省署重領郡符延英面辭親承教誨命卽路星言
載馳到任之初便逢災疫奉宣聖澤恭守詔條上稟睿謨
下求人瘼才術雖短憂勞則深幸免流離漸臻完復皆承
聖化所及遂使人心獲安豈由微臣薄劣能致臣素乏親

黨家本孤貧年衰無酒色之娛性拙無博奕之藝自領大
郡又逢時災晝夜苦心寢食忘味曾經誣毀每事防虞惟
託神明更無媒援豈期片善上達宸聰迴日月之重光燭
江湘之下國絲綸褒異苦節旣彰印綬煒煌老容如少望
雲天而拜舞豈盡丹誠視環珞以徘徊空嗟白首無任感
激屏營之至

謝差中使送上表

臣某言中使吐突仕曉至奉宣聖旨慰諭并送臣至本任
者深山遠郡忽降王人跪受恩榮仰瞻宸極伏以發自巴

峽至於南荒涉水陸湍險之途當炎夏鬱蒸之候山川縈
轉晨夜奔馳幸無他疾得至本管九重結戀遙傾捧日之
心萬里獲安皆荷自天之祐無任感戴屏營之至

代杜司徒謝男授官表

臣某言伏奉今月一日制授臣長男師損祕書省著作郎
次男式方太常寺主簿又得進奏官裴邁狀報伏承聖恩
特降中使送官告到臣宅分付師損者寵渥非常授任不
次驚躍無措覲懼失容臣某中謝臣謬分重寄獲守外藩
受恩旣深無績可紀男師損等器惟凡品教闕義方早沐

睿慈已階官次每懷塵忝常誠滿盈豈謂鴻霈曲覃大明
私照寬臣尸素之責念臣葵藿之誠下延允息叨踐班級
天書出禁中貴臨門榮冠等夷慶流宗族况著作乃撰論
之地惟史才是居太常實禮樂之司非儒者勿履顧茲庸
謬忽此超升內省慙惶若墜冰谷伏以聖朝立制建官惟
賢名實無非輪轅盡適微臣父子獨爲幸人非據踰涯自
中徂外虛受邱山之賜實增負乘之憂進退彷徨不知所
據無任戰汗屏營之至

